

Drama di Urirama posponi 'tot nader orde'

AYERA den Parlamento a trata e situacion di e Parke di Molina na Urirama. Hopi t'e discucionnan rond di e topico aki y for di mainta un grupo di hende a presenta na Parlamento p'asina sigui e reunion en bibo.

E discusion rond di e Parke di Molina ta mas tanto si e proyecto mester sigui of no y un otro discusion ta cu si e molinanan aki lo por tin consecuencia pa salud di e hendenan cu ta biba den su becindario. Segun e raport di MER, mirando e distancia di e casnan p'e Parke nan no ta mira cu esaki lo por tin influencia negativo riba e salud di e habitantenan.

Mester bisa cu despues di basta tempo e fraccion di MEP tabata completo atrobe den sala di Parlamento. A dicidi cu p'e reunion aki si nan mester cumpli cu nan deber di traha pa pueblo y a stop e campaña pa un dia p'asina bin bringa den Parlamento pa un causa noble.

Durante diferente di e discursionan a compara Urirama hopi cu e situacion na Vader Piet. Ta cuestiona con e tempo ey ningun musca no a bula y e parke ta sigui draai trankilamente te dia di awe sin cu ningun hende a sali na defensa di e habitantenan di San Nicolas.

Parlamentario Eddie Briesen a para riba cu el a nace na San Nicolas, a biba henter su bida na San Nicolas y cu un dia e ta spera di muri na San Nicolas tambe y cu mirando cu Vader Piet tabata un proyecto di MEP cu a bay sin ningun estudio riba salud, cu e ta spera cu awor AVP no mester comete e mesun error y implementa cos sin busca di sa e consecuencianan. Ciertu momento Parlamentario Clarisca Velasquez a trece dilanti cu e no por compronde con un

Parlamentario cu nunca ta presente di repente ta bin haci yen di comentario y riba esaki Parlamentario Eddie Briesen a contesta cu e no mester ta presente den Parlamento p'e por traha y cu e no ta stempelparlament.

Parlamentario Andin Bikker a cuminsa bisando cu e sa cu desicion ya ta tuma pues e ta prefera di bay riba e puntonan pakico esaki lo no ta un bon desicion. Segun Parlamentario Bikker ni WEB cu ta un di e instancianan cu lo mester sostene e Parke aki, ta muestra di ta impresiona cu e molinanan ya cu segun nan lo tin metodonan mas moderno.

E aspecto di salud di e habitantenan tambe a preocupa Bikker y e ta kere cu mester tuma esaki na serio.

Tambe Parlamentario Booshi Wever a bay riba e aspecto aki, pero cierto momento su atencion a disminui y el a bay comenta riba loke ta sosodiendo den publico unda cu un señora lo a wordo saca for di e sala paso e ta ofende Minister y Parlamentarionan. (Nota di Red: Nada di esaki ta berdad).

Segun Parlamentario Wever, no mester saca e señora for di den Parlamento paso e tabata insulta hende berdad pero durante di schorsing pues no ta permiti pa saca hende durante di schorsing. Ki otro argumentacion por spera di un Parlamentario cu den pasado a ofende coleganan den Parlamento te cu el a bay para den Corte p'esaki.

Awor hende ta permiti pa insulta Parlamentario y Ministernan basta cu ta durante schorsing. Pa caba di drecha cuenta Parlamentario Wever a pidi Presidente di Parlamento pa revoca su desicion y laga e señora drenta bek den



Parlamento paso un dama bo no ta trata asina.

Imagina si Parlamentario Booshi Wever lo a pidi su Hunta di Partido mesun cos tempo cu nan a insulta y humiya dos di su coleganan femenino y saca nan na mal forma for di partido.

Parlamentario Juan Ady Thijsen di su banda a papia ayera riba consenshi di Parlamentarionan. Segun e Parlamentario, e proyecto di Urirama awor ta depende di e consenshi di e Parlamentarionan di AVP, ya cu nan a anuncia cu e ta un done deal. P'e motibo aki Parlamentario Thijsen a referi na un quote di Martin Luther King Jr.: "There comes a time when one must take a position that is neither safe, nor politic, nor popular, but he must take it because conscience tells him it is right."

Parlamentario Evelyne Wever Croes a papia hopi riba e consecuencianan pa salud di e habitantenan. E ta keda cuestiona e hecho cu apesar cu tin raportnan internacional cu ta bisa cu molinanan tin influencia negativo riba salud di hende, aki na Aruba nos ta simplemente acepta esaki asina sin mas.

E Parlamentario ta kere cu Aruba mester stop di laga su mes wordo influencia pa desaroyonan internacional sin busca drechi kico esaki ta nifica realmente pa nos Pais.

Parti atardi e ambiente a cuminsa bira, manera ta expresa den boca di pueblo, mas hot y Presidente di Parlamento, Crhis Dammers a dicidi di pospone e reunion 'tot nader orde'. Loke ta importante den henter e discusion aki ta si e parke di Molina aki ta ubica na un bon lugar, si e tin consecuencianan negativo pa salud di hende, si no tin otro alternativa mihor y/of mas barata y tambe loke hopi hende no ta para keto na dje, cu e parke aki lo por kibra e paz cu ta reina den e region ey cu hopi hende, tanto turista como local, ta considera sagrado y cu tin un balor hopi sentimental pa mayoria Arubiano.

Ta muestra cu esun cu mester tuma pildora pa drumi t'e Pueblo, p'asina e hendenan no keda lanta henter anochi ta yora riba tanto barbaridad cu ta wordo papia den nos Parlamento di Aruba sin bay al caso y busca solucion p'e origen di e problema.